

# In tagl massiv

La rait dals uffizis da posta en il Grischun

DA LUCAS DEPLAZES / ANR

■ **La rait dals uffizis da posta en il Grischun vegn reducida massivamain. En quest senn ponderescha ella er ina collavuraziun pli stretga cun la Viafier retica. Quai ha La Posta annunzià ier a Berna. En il chantun Grischun datti en l'avegnir 32 uffizis da posta, 78 agenturas e 140 servetschs da chasa.** Già l'atun passà ha La Posta annunzià ina reducziun massiva dals uffizis da posta dad actualmain 1400 sin var 800 fin 900 durant ils proxims onns. La pli gronda part da quests uffizis vegn midada en agenturas che porchian in pli lung temp d'avertura. Pertutgadas da quella restructuraziun sajan var 1200 plazzas da lavur. Relaschadas na duaja quai dar naginas. La nova rait dals uffizis da posta vegn mintgamaì examinada en collavuraziun cun ils chantuns e cun las vischnancas. Ils chantuns n'han dentant nagina pussaivladad d'intervegnir en ils cas singuls. Mo las vischnancas han tenor la lescha il dretg da recurs a PostCom.

**Ils basegns da la clientella sa midan** Ils exponents da La Posta han accentuà ils novs basegns da la clientella. Decisiv per il mantegniment d'ina posta saja il diever dals clients. Na giajan quels betg pli al spurtegl, na possian ins era betg mantegnair avert la posta, han ils responsabels constatà. La Po-



sta tschertga perquai in mix tranter pussaivladads d'access fisics e digital. Fin l'onn 2020 vul La Posta midar l'organisaziun actuala en 23 uffizis (mira glista) da noss chantun. Pertutgadas èn 23 personas. Per mintgina tschertga La Posta ina schliaziun cunvegna.

## Las gasettas sin gentar

En l'avegnir vul La Posta meglierar l'infurmaziun e la collavuraziun cun las

vischnancas e cun il pievel. Ella tschertgia il dialog e veglia resguardar ils giavischs da la populaziun, sche pussaivel. En quest senn vul ella garantir la distribuziun da las gasettas sil pli tard sin gentar. Fin il mais da settember 2017 duain ils clients era pudair pajar ils quints a chasa tar il postin. Cun novas purschidas sco «MyPost 24», pussaivladads da retrair pachets e da pudair metter tals sin posta vul La Posta

esser innovativa. Finamira è da crear 4000 puncts d'access fin l'onn 2020.

Sin la dumonda da l'Agentura da novitads rumantscha tge che succedia suenter l'onn 2020 n'han ils representants betg pudì u vulì concretisar. Il svilup saja memia intschert. Determinants vegnian ad esser ils basegns da la clientella e la novas pussaivladads da comunicaziun.

## Glista dals 24 uffizis da posts che duain svanir

Bivio, Breil/Brigels, Brusio, Cazis, Celestina, Chur Lacuna, Churvalden, Davos Dorf, Küblis, Laax, Maloja, Obersaxen, San Bernardino, Sedrun, Silvaplana, Sta. Maria Val Müstair, Tiefencastel, Trimis, Trun, Tumeagl/Tomils, Untervaz, Versam, Vals, Zuoz.  
(Per Churwalden, Maloja, San Bernardino, Sta. Maria Val Müstair e Trimmis è la nova organisaziun gai clera.)

## Syndicom protesta

Il sindicat syndicom renfatscha a La Posta ch'ella ignoreschia ils signals da la politica. Syndicom fa attent a la recente moziun da la cumissiun da traffic dal cussegl naziunal che pretendia criteris d'access als uffizis da posta ed in schlargiment dal provement da basa. Quella moziun vegnia era sustegnida da la cumissiun dal cussegl dals chantuns. Syndicom pretendia perquai dal cussegl federal ch'el stoppia definir da nov las strategias da La Posta e respectar la voluntad da la politica. Sche la politica n'intervegniva betg uss, saja quai prest memia tard.

En il Grischun duain 24 uffizis da posta svanir. KEYSTONE